



I.



Monstraturus sum viam, multis abhinc seculis tritam, & antiquitate quidem sua satis illustrem, nec ulli facile peregrinantium ignotam. Est illa via regia Lusatiae Superioris, qua ex Polonia & Silesia itur in Bohemiam, Misniam, Thuringiam, & Saxoniam, aliasque Germaniae provincias, illis quidem, qui merces vel importantes, vel exportantes, Quissum, Lusatiae superioris fluvium, transeunt, ita tenenda, ut, postquam Vratislaviam, Brigam aliasque hujus regionis urbes accesserint, inde Lignicium, Haynam, Bunslaviam, Naumburgum aut Loebenbergam, mox Laubam, & Gorlicium tendant, inde Bohemiam petituri, Zittaviam, Saxoniam vero aliasque Germaniae provincias adituri, Budissam, Camencium, Koenigsbruckam, Haynam, Oschacium, hinc vero vel Eulenburgum vel Grimmam, Lipsiam usque proficiscantur. Hæc via variis quidem variorum Imperatorum, regum, principumque sanctionibus satis est munita, adeoque certa & simplex, ut mirum videri posset quibusdam, nos lucem facere, ubi nox est nulla, & id demonstrare, cujus nemo est ignarus. Hi autem si intellexerint, quantopere hæc via improborum hominum, optimorum principum intentionem eludentium, cavillationibus